

建置志

志曰王制司空掌邦土度地居民蓋建置興作亦王政所不廢者邑在前代建置頗多但因革不一傾頽既久惟於城池學校而外有名在基存者無敢或遺其他不可考者亦無由志矣志

建置

城池

始建未詳自漢唐來稱重鎮及石敬瑭後歷宋金元五百餘年至明始歸版圖洪武為鎮朔永

樂為左衛正統間以邊外雲川衛內徙附入為
左雲川衛始磚包城週圍十里一百二十步高
三丈五尺濠深二丈南北西門三座以東面高
峻傍山岡不便設門特闕焉北額控朔外永安
南額拱辰外永綏西額靖遠外永清南關外門
曰望恆以東面雖不設門議建一樓以利眺望
窩鋪五十座南關廂初甚宏偉嘉靖丁未副總
兵吳公鼎東西各削其半制稍儉丙寅兵備僉
事韓公應元會總督侍郎吳公克巡撫鄭公洛

同副總兵麻公貴議重修增築加七尺通高四丈二尺復建兩滴水大城樓三座各豎一匾北曰雄鎮大漠南曰名都重輔西曰永控玉關號房一十八間對樓九間將軍樓九間牌防九空北城添建關帝廟一座號房一十八間甕城內土地廟三間四角磚樓四座沿城樓鋪四十六座修釘城門九合磚包甕城裏外見西門誌石萬厯辛丑左叅政樊公東謨建東城樓匾其東曰羣護陵京南曰至於太原西曰雲西第一觀北曰虜在

目中雉堞已狀萬歷庚戌右布政韓公策復拓
修南關城並大城頂牆關門三建樓各五楹南
曰宣平東曰景陽北曰安甯敵角四建樓各三
楹敵臺二建鋪各一楹大城加墁一層女牆俱
改磚砌閣偉堅緻勝概倍增今又百十餘年制
非舊矣

舊分管

邊牆長十三里九分 邊墩二十四座接烽墩五
十四座

城堡

助馬堡

城連大關通高三丈女牆八尺系口四百三十四週圍三里七分上建大樓三座角樓九座東門一座南門一座由嘉靖二十四年興築土城萬厯元年磚包內設叅將署一座棘門東西澄清一路關外長城二坊大關守備署一座雲中鎖鑰坊一架四牌坊東曰和陽西曰靖遠南曰廣仁北曰永定東門外教場一座邊長二十五里三分

三屯堡

東至張七梁六里南至縣城十五里西至

右五六十里北至甯魯十五里所轄邊牆一里

七分邊墩一座城高三丈五尺週圍二百步隆慶

三年始築萬歷二年磚包年久有殘破處

甯魯堡

東至威魯二十里南至三屯十五里西至

破虎三十里北至大邊五里墩臺十八座接火

墩十一座邊長十一里三分城高三丈七尺週

圍二里七分建於嘉靖癸卯磚包於萬歷癸酉

威魯堡

東至滅魯二十里南至雲西三十里西至

甯魯二十里北至大邊二里墩臺十六座接火
墩八座邊長十一里九分城高三丈八尺週圍
二里二分土關一座週圍三百一十八丈
建於嘉靖癸卯磚包萬曆癸酉

保安堡 東至拒門二十里南至藏魯十五里北

至助馬二十里西至大邊二里墩臺十五座接
火墩四座邊長十四里三分城高三丈七尺週
圍一里三分土關一座週圍三百一十四丈
建包與助馬同時

拒門堡 東至拒牆南至破魯西至助馬俱二十
里北至大邊五里墩臺二十三座接火墩七座
邊長十五里城高三丈二尺週圍一里八分與
助馬同時建包

破魯堡 東至鎮河二十五里南至高山三十五
里西至滅魯十七里北至助馬二十里接火墩
臺五座不臨大邊城高四丈二尺週圍三里三
分建包與威魯同時

滅魯堡 東至破魯十七里南至高山三十里西

至威魯二十里北至保安十四里墩臺六座接
火墩十座邊長四里三分城高三丈五尺週圍
二里四分嘉靖癸卯建

雲岡堡 東至大同西至高山各三十里南北俱
村接火墩臺八座新舊二堡舊設崖下嘉靖之
戊午也因北面受敵議移岡上萬歷之甲戌也
舊者仍留以便行旅新者尚土築女牆係磚包
共高三丈五尺週圍一里五分下有寒泉皆佛
窟亦靈境也石佛考佛坐像體高五丈一尺五寸

高山城 城高四丈二尺週圍四里三分建於嘉

靖乙未包於萬歷丙子

雲西堡 東至高山西至左雲俱三十里北至威

魯三十里南至石佛村五里接火墩臺十座城

高三丈五尺週圍一里三分建於嘉靖戊午包

於萬歷甲午

破虎堡 城高三丈八尺週圍二里建自嘉靖甲

辰包於萬歷甲戌

汛防

左雲城守千總一員 外委二員 馬步兵七十名

汛防四路 共鋪一十一處 每鋪設馬兵一名步兵四名

東路 十里鋪 二十里鋪 往東高山城汛防 沙嶺梁鋪

南路 南金莊鋪 紅溝鋪

水泉鋪 臧家店鋪 四十里莊鋪

吳家窰鋪 往南懷仁縣界

西南路 啞叭嶺鋪 往西右玉縣界

西北路 西十里鋪 往西右玉縣界

東南隅 敵臺一座 因修九窰十八洞以備眺望遺尚存

助馬堡設防

叅將一員 中軍守備一員 外委把總二員 馬步守兵二百四十名 汛舖三處

三屯堡

明設把總今裁

甯魯堡

明設守備今改設把總一員 馬步守兵四十名 汛舖三處

威魯堡

明設守備今改設千總一員 馬步守兵四十名 汛舖三處

保安堡

前明設操守今改設把總

馬步守兵三十八名

汛鋪一處

拒門堡

明原設操守今改設把總

馬步守兵四十名

汛鋪三處

破魯堡

明設守備後改設把總今裁

滅魯堡

明設守備今裁

雲岡堡

明設孫守今裁

高山城

明設守備一員 千戶一員 今改設都司一員

千總一員 外委二員 馬步守兵共六十八名

汛舖七處

站馬歸縣

雲西堡

明設操守今裁

破虎堡

明設守備今改設把總一員官屬助馬路民籍錢糧歸併右

玉縣

學校

文廟在縣城西大街中為大殿五間康熙二十四年翼以兩廡各一十五楹前為大成門三間東名宦祠三間西鄉賢祠三間前為泮池跨以石橋橋外為櫺星門牌坊三空東柵牌坊曰金聲玉振西柵牌坊曰江漢秋陽緊東為學門門角魁星樓一座向北照壁後崇聖祠三楹敬一亭一座大殿後為明倫堂堂左博文齋三間堂右約禮齋三間

兩旁門二座東奎垣西映秀明倫堂後為尊經閣
西有講堂三楹同治年間秦文煥重修揆有牌坊
一座曰文行忠信徵東書房三間今廢後為訓導
宅共九間其省牲齋宿之所碑箴之亭無一不備
康熙二十九年奉

旨豎下馬碑於樞星門外東西各一

聖祖仁皇帝匾

萬世師表

世宗憲皇帝匾

生民未有

高宗純皇帝匾

與天地參

仁宗睿皇帝匾

聖集大成

宣宗成皇帝匾

聖協時中

文宗顯皇帝匾

德齊疇載